

Inzko: Politiziranje je samo skretanje pažnje – BiH se mora ponovo fokusirati na evropski put i ekonomiju



Visoki predstavnik i specijalni predstavnik EU Valentin Inzko danas su u Sarajevu sastao s gospođom Tamsyn Barton, direktoricom Sektora za Evropu pri Odjelu za međunarodni razvoj Velike Britanije (DFID).

Primjećujući da se bosanskohercegovački lideri u protekle tri godine spotiču od krize do krize, dok ekonomija ide silaznom putanjom i aktivnosti vezane za evropsku integraciju su stavljene na čekanje, visoki predstavnik i specijalni predstavnik EU je podvukao kako je «u političkoj dinamici zemlje potreban suštinski zaokret».

«Bosanskohercegovački politički lideri moraju se ponovo angažirati na vođenju istinskog dijaloga usmjerenog na pronalaženje rješenja i postizanje kompromisa», rekao je visoki predstavnik i specijalni predstavnik EU Inzko. «Sve drugo predstavlja samo skretanje pažnje sa stvarnih problema s kojima se ova zemlja suočava.»

Visoki predstavnik i specijalni predstavnik EU je podvukao da OHR nastavlja raditi na ciljevima i uslovima koje je Upravni odbor Vijeća za implementaciju mira definirao za zatvaranje OHR-a i za prelazak na intenzivnije prisustvo Evropske unije u

BiH. Istovremeno, Evropska unija se priprema za izazove koje će Bosna i Hercegovina postaviti. «Svi instrumenti potrebni da se osigura napredak zemlje bit će na raspolaganju specijalnom predstavniku EU već od prvog dana», rekao je Inzko.

Visoki predstavnik i specijalni predstavnik EU je rekao da političke stranke moraju pronaći snagu koja im je potrebna za ustavnu reformu. „Ta reforma će donijeti stabilnost i funkcionalnost koju će građani ove zemlje jako cijeniti.“